



JUDICIAL SYSTEM MONITORING PROGRAMME
PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Períodu : Outubru 2011

Edisaun : 10 Outubru 2011

**JSMP Habelar Informasaun konabá Kna'ar Parlamentu
Nasionál Iha Suco Hataz Distritu Maliana**

Iha loron 7 Outubru 2011, Judicial System Monitoring Programme (JSMP), atraves husi Sub Unidade Programa Observasaun Parlamentu (POP), halao wokshop loron ida iha Suco Hataz Sub Distritu Atabae, Distritu Maliana. Workshop ne'e ho topikun konabá Kna'ar Parlamentu Nasionál no Prosesu Legislativu iha Timór Lésté.

Objetivu husi workshop ne'e mak, atu habelar no hakbi'it liutan povu nia koñesementu konabá kna'ar Parlamentu Nasionál nu'udar reprezentante povu iha Timór Lésté tomak iha Uma Fukun Parlamentu Nasionál no oinsá povu bele partisipa iha prosesu lejislativu.

Iha workshop ne'e equipa fasilitador JSMP/POP koko esplika kestaun jerál konabá prinsipiu Estada de Direítu tuir Konstituisaun RDTL, kestaun separasaun poderes, Papél Parlamentu Nasionál (PN), Governu, Tribunál no Prezidente da República sira ida-idak nian bá partisipantes sira ne'ebé kompostu hosi feto ema nain 12 no mane hamutuk ema 21no total ema nain 33.

Diretór ezekutivu JSMP Luis Olivera da Sampaio *haktuir katak, Parlamentu Nasionál hanesan orgaun representativu, ne'ebé representa ema timór-oan tomak iha kbi'it atu halo lei, fiskaliza no halo desizaun política tuir artigu 92 Konstitusaun República Demokratika Timór Lésté. Ho kbi'it tolu, tuir loloos Parlamentu Nasionál bele influensia política konkreta ne'ebé afeta direktamente ba povu nia vida, maibé dala-barak realidade ida ne'e la akontese. Tanbá ne'e JSMP organiza workshop ida ne'e atu enkoraja públiku atu reklama sira nia direítu liu husi sira nia reprezentante iha Parlamentu Nasionál.*

Tanbá ne'e refere ba artigu ne'e, comunidade iha Suco Hataz ne'ebé inklui suco seluk mós persiza atu hatene no koñese diak liu tan oinsá prosesu halo lei no oinsá sidadaun

sira nia partisipasaun iha prosesu halo lei. Tanbá lei ne'e mais importante ba povu Timór Lésté tomak inklui komunidadé atu hatene hodi bele aplika ho diak iha futuru.

Hafoin rona tiha programa fahe informasaun ne'e, partisipantes sira rekomenda pontus balu mak hanesan tuir mai ne'e:

- ✧ Husu bá distintos deputadus sira atu halo fiskalizaun to'o iha baze iha suco no aldeia tomak inklui sira nia suco ne'ebé to'o oras ne'e seidak hetan oportunidade hasoru malu ho distintos deputadus sira bainhira halo fiskalizaun iha baze.
- ✧ Husu mós bá distintos deputadu sira atu halo lei persiza halo konsultasaun bá povu liu-liu ho lia nain sira iha baze atu nune'é la bele kontradiz ho tradisaun kultura moris ema nian.
- ✧ Husu bá distintos deputadu sira atu halo sosializaun klean no nakloke bá lei sira ne'ebe sira aprova ona ba komunidadé sira ne'ebé moris iha baze.

Tuir observasaun POP nian, pedidu hirak ne'e balu, akontese mós iha distritu sira seluk wainhira POP halo atividade workshop iha sesaun sira liu ba¹.

Rekomendasaun hirak ne'e hato'ó husi Xefe Suco refere no partisipantes sira wainhira rona tiha katak distintos deputadus sira iha kna'ar atu fiskaliza bá programa governu nian iha baze no realidade sira seluk ne'ebé deskobre iha leten.

Hatan ba preokupasaun hirak ne'e, JSMP informa ba partisipantes sira katak JSMP sei halo esforsu hotu ne'ebe posível atu servisu hamutuk ho distintos deputadus sira hodi kumpri no ezerse sira nia kompentensia tuir lei haruka.

Workshop ne'e bele realiza tanbá hetan apoiu finanseru husi “The Asia Foundation no USAID “

Atu hetan informasaun kle'an, favor kontaktu:

Luis de Oliveria Sampaio
Diretór Ezekutivu JSMP
Email: luis@jsmp.minihub.org
Landline: +670 3323883

¹ Haree Komunikadu Imprensa JSMP nian iha fulan Maiu 2011 iha website www.jsmp.minihub.org ho titlu “JSMP Habelar Prosesu Lejislativu Iha Suku Bibileo Distritu Viqueque.”